

**“ELIKA NEKAZARITZAKO ELIKAGAIEN SEGURTASUNERAKO EUSKAL FUNDAZIOA-ELIKA FUNDACIÓN VASCA PARA LA SEGURIDAD AGROALIMENTARIA” ERAKUNDEAREN ESTATUTUAK**

**I. TITULUA.- XEDAPEN OROKORRAK**

**1. artikulua.- Eraketa, izena eta iraupena**

1- “ELIKA Nekazaritzako Elikagaien Segurtasunerako Euskal Fundazioa-ELIKA Fundación Vasca para la Seguridad Agroalimentaria” (aurrerantzean, ELIKA Fundazioa) izenpean eratzen da fundazio bat, Euskal Autonomia Erkidegoko Fundazioei buruzko ekainaren 9/2016 Legearen eta indarrean dauden gainerako arauen arabera.

2- ELIKA Fundazioa irabazi-asmorik gabeko erakundea da, eta haren ondarea estatutu hauen 3. artikuluan deskribatzen diren interes orokorreko helburuetarako lotuta dago modu iraunkorrean, fundatzaileek hala nahi izan dutelako.

**2. artikulua.- Araubidea, gaitasuna eta nortasun juridikoa**

1- ELIKA Fundazioak nortasun juridiko propioa eta independentea du, eraketa-eskritura Fundazioen Erregistroan inskribatzen denetik aurrera. Halaber, gaitasun juridiko eta jarduteko gaitasun osoa izango du, muga hauekin soilik: sortzaileek beren borondatez fundazioa osatzen duten ekitaldian adierazitakoak, estatutu hauetan ezarritakoak, eta, betiere, aplikatzekoak diren lege xedapenetan eta bereziki ekainaren 2ko 9/2016 Legean, Euskal Autonomia Erkidegoko Fundazioei buruzkoan jasotakoak.

2- Horrenbestez, eta Babesletzari egin beharreko komunikazioak eragotzi gabe, Fundazioak jarduteko erabateko gaitasuna izango du bere helburuak betetzeko, Kode Zibilaren 38. artikuluan ezarritakoaren arabera. Fundazioak ondoren azaltzen den guztia egin ahalko du:

a) Mota guztietako jarduera ekonomikoak garatzea, elkartearen helburuak lortze aldera edo helburuok lortzeko baliabideak batze aldera.

b) Mota guztietako ondasunak eta eskubideak bereganatu eta besterentzea, edozein tituluren bidez, eta mota guztietako egintzak, negozioak eta kontratuak egin.

c) Edozein motatako egintzak baliatzea, bere estatutuen eta legeen arabera.

### **3. artikulua.- Fundazioaren helburuak**

*ELIKA Fundazioaren zeregina da, hain zuzen ere, nekazaritzako elikagaien segurtasunaren arloan informatu, aholkatu eta sustatzea. Arlo horretan gauzatuko dituen jarduerak hainbat funtzio hartzen dute barne:*

- *Irizpen zientifiko independenteak ematea nekazaritzako elikagaien segurtasunarekin lotutako alderdi guztiei buruz.*
- *Nekazaritzako elikagaien arriskuak ebaluatzea eta horiek prebenitzeko, murrizteko edo gutxienera txikitzeo neurriak garatzea.*
- *Nekazaritzako elikagaien segurtasunaren arloan ikertzeo gai berriak proposatzea Eusko Jaurlaritzari.*
- *Nekazaritzako elikagaien krisi-egoeretan jarduteko prozedurak prestatzea.*
- *Euskal Autonomia Erkidegoko lehen sektoreko, animalien elikadurako eta nekazaritzako elikagaien enpresetako segurtasunaren eta prozesuen hobekuntza sustatzea eta bultzatzea.*
- *Ekoizpen iraunkor eta ingurumenarekiko begirunetsua sustatzea.*
- *Elikadura segurua, jasangarria eta osasungarria bultzatzea.*
- *Lehiaketa, biltzar eta konferentziak antolatzea.*
- *Arloko aldizkari eta argitalpen espezializatuak argitaratzea.*
- *Bere helburuak gauzatzeko lagungarri izan dezakeen beste funtzio oro.*

*Fundazioaren helburuak Fundazioak berak gara ditzake egokitzat iruditzen zaion moduan, beste entitate eta erakunde batzuetan parte hartzea barne, eta muga bakarrak fundazio-gutunak, estatutu hauek eta, bidezkoa bada, legeek ezarritakoak izango dira.*

### **4. artikulua.- Helbidea eta lurralde-eremua**

- 1- *Fundazioak Arkauteko (Araba) Nekazaritza Eskolan (z.g.) du bere helbidea.*
- 2- *Patronatuak aske erabaki ahalko du helbide soziala aldatzea, eta erabaki hori Fundazioen Erregistroari jakinaraziko zaio. Halaber, Patronatuari ahalmena ematen zaio establezimenduen, ordezkartzen edo bulegoen egoitzak hautatzeko, kasuan kasuko Fundazioaren helburuak betetzeko eginkizunean sortzen diren beharizanen arabera.*
- 3- *Fundazioak bere jarduerak nagusiki Euskal Autonomia Erkidegoaren eremuan garatuko ditu. Hala eta guztiz ere, helburua kontuan hartuta, zientzia- eta administrazio-harremanak Europar Batasunera eta munduaren gainerako tokietara zabalduko dira.*

## **5. artikulua.- Onuradunak**

1- Fundazioak, interes orokorreko bere helburuen barruan, objektibotasuneko eta inpartzialtasuneko irizpideei jarraikiz jardungo du beren onuradunen aukeran, inongo bereizkeriarik suertatzeko aukerarik eman gabe.

2- Ildo horri jarraikiz, onuradun izan ahalko dira honako hauek: Pertsona fisikoak eta juridikoak, enpresa publikoak eta pribatuak, administrazio publikoak eta haien mendeko erakundeak, elkarteak, zuzenbide publiko eta pribatuko korporazioak, kofradiak, erakundeak, fundazioak eta gainerako entitateak, baldin eta Fundazioaren helburuekin zerikusia badute eta, batik bat, Euskal Autonomia Erkidegoan helbideratuta badaude, noizean behin Euskal Autonomia Erkidegotik kanpo egoitza duten bestelako entitateak onuradun izatearen kalterik gabe.

Onuradunak ez dira inoiz banaka zehaztuko, eta ezingo da bideratu fundazioaren prestaziorik fundatzaileei, haien ezkontideei edo laugarren mailara arteko ahaideei (laugarren mailakoak barne).

Fundazioak onuradunei emandako zerbitzuen truke zenbatekoren bat ordaintzeko eskatzen dienean, onuradunak zenbateko hori ordaintzean zehaztuko ditu.

Era berean, Fundazioaren izaera bera kontuan hartuta, onuradunen kopurua mugatu behar denean, Fundazioaren Patronatuak modu ezeztazinean hautatu eta zehaztuko ditu, eta, xede horrez, hautagaien merezimenduei, beharrei, gaitasun ekonomikoari eta aprobetxatzeko gaitasunari erreparatuko die edo, bestela, beste ezaugarri objektibo batzuetan oinarrituko da. Nolanahi ere, inork ere ezin izango du alegatu, ez bakarka ez taldeka, Fundazioaren edo bere organoen aurrean, onura horiek eman baino lehen baliatzeko aukera, ezta pertsona jakin batzuei emanarazi ere.

3- Ezin zaizkienean onuradun guztiei prestazioak edo zerbitzuak eman, irizpide, ordena eta lehentasuna hauen arabera izango dira onuradunak:

Fundazioak onuradunek onurak izateko bete behar dituzten baldintzak eta eskakizunak ezarri ahalko ditu. Halaber, Fundazioak egokitzat iruditzen zaizkion neurriak hartu ahal izango ditu aurreko paragrafoan azaltzen diren baldintzak betetzen direla ziurtatzeko.

## **6. artikulua.- Jarduketa- eta funtzionamendu-printzipioak**

Fundazioak printzipio hauek beteko ditu bere jarduketan:

a) Publikotasuna eta gardentasuna. Fundazioaren xede eta jardueri buruzko informazio nahikoa emango du, herritarrek oro har eta behin-behineko onuradunek haien berri izan dezaten.

b) Inpartzialtasuna eta bereizkeriarik eza pertsona onuradunak zehazterakoan, baita jarduerak eta prestazioak zehazterakoan ere.

c) Jarduteko jarraibideak sustatzea. Horretarako, jokabide-kodeak eta jardunbide egokien kodeak sortuko ditu.

d) Patronatuko kideen zerbitzu-espirtua sustatzea, baita Fundazioaren interesak norberaren interesen aldean lehenesteko espirtuarena ere.

e) Etengabeko lankidetzak leiala Euskal Autonomia Erkidegoko Fundazioen Babesletzarekin.

f) Fundazioaren ondarea eta errentak fundazioaren beraren helburuetara bideratzeko eskakizuna benetan betetzen dela defendatu eta zaintzea, estatutu hauetan eta indarrean dagoen legedian aurreikusitakoarekin bat etorrira.

g) Genero-berdintasuna.

## **II TITULUA.- PATRONATUA**

### **7. artikulua.- Fundazioaren Patronatua**

Patronatua Fundazioaren gobernu- eta ordezkaritza-organoa da. Patronatuari egokituko zaio Fundazioaren helburuak betetzea, Fundazioaren ondarea osatzen duten ondasun eta eskubideak arduraz administratzea, baita haien errendimendua eta erabilgarritasuna segurtatzea ere.

### **8. artikulua.- Patronatuaren osaera**

1- Patronatuak gutxienez bederatzi (9) kide, eta gehienez hamalau (14) kide izango ditu.

Patronatukideek gutxienezko kide-kopuruari eutsi behar diote (bederatzi behintzat).

2- Pertsona fisikoak zein juridikoak izan ahalko dira patronatukideak. Patronatua osatzen duten pertsona fisikoek jarduteko gaitasun osoa izan beharko dute, eta ezin izango dute desgaituta egon kargu publikoak betetzeko. Patronatukideak diren pertsona juridikoek izendatu beharko dituzte organo horretan haien ordezkari izango diren pertsona fisikoak (bakarra ere izan daiteke).

### 3- Hauek izango dira patronatukideak:

- *Presidentea*
- *Idazkaria (Fundazioko patronatukidea ez bada, eta, horrenbestez, ahotsa bai baina botorik ez badauka, espresuki adierazi behar da hori gertatzen dela).*
- *Diruzaina (aukerakoa)*
- *Presidenteordea (aukerakoa)*
- *Kideak*

### *Hauek izango dira Fundazioaren Patronatuko berezko kargudunak:*

- a) *Elikaduraren, landa garapenaren, nekazaritzaren eta arrantzaren arloan eskumena duen sailburuordetzako titularra edo dagokion sailean arlo horretan eskumena duen sailburuordea.*
- b) *Elikaduraren, landa-garapenaren, nekazaritzaren eta arrantzaren arloan eskumena duen saileko Zerbitzuen Zuzendaritzako titularra.*
- c) *Elikaduraren, landa-garapenaren, nekazaritzaren eta arrantzaren arloan eskumena duen saileko titularrak, ahal dela sailburuordeak edo, halakorik ezean, zuzendariak, patronatuko bi kide izendatuko ditu berariaz.*
- d) *Patronatukide bat osasunaren arloan sail eskuduneko titularrak berariaz izendatuko du.*
- e) *Patronatukide bat ekonomia eta ogasunaren arloan saileko titularrak berariaz izendatuko du.*
- f) *Patronatukide bat kontsumoaren arloan sail eskuduneko titularrak berariaz izendatuko du.*
- g) *Patronatukide bat FUNDACION AZTI-AZTI FUNDAZIOAren Patronatuak berariaz izendatuko du.*
- h) *Patronatukide bat FUNDACION AZTI-AZTI FUNDAZIOAren Patronatuak berariaz izendatuko du.*
- i) *Patronatukide bat NEIKER-eko Administrazio Kontseiluak berariaz izendatuko du.*

*Halaber, hala egitea komeni bada, kide berriak izendatu ahal izango dira Fundazioko Patronatuaren ekimenez, eta Fundazioko presidenteak izendatu beharko du kide berria. Gainera, Fundazioko Patronatuak berak izendatutako kidea kargutik kendu ahal izango da inguruabarrek hala eskatzen dutenetan. Halakoan ere Fundazioko presidenteak kenduko du kargutik.*

## **9. artikulua.- Patronatuko kideen izendapena eta kargu-uztea**

1- Patronatukide berriak izendatu behar direnean, kide gehiago izango direlako edo kideren bat ordezkatu behar delako, gobernu-organo horrek izendatuko ditu. Erabakia hartzeko kide gehienen aldeko botoa beharko da.

2- Patronatuak hiru hilabeteko epean eman beharko dio bere kideen izendapenaren eta kargua utzi izanaren berri Euskal Autonomia Erkidegoko Fundazioen Erregistroari, izendatze- edo kargu uzte-akordioak hartzen diren egunetik zenbatzen hasita.

3- Patronatukideek espresuki onartu beharko dute beren izendapena Euskal Autonomia Erkidegoko Fundazioei buruzko Legearen 16. artikuluan aurreikusitako moduren baten arabera. Karguari uko egiten badiote, aipatu artikulua 2. atalean aurreikusitako moduren batean egin beharko dute.

4- Patronatukideen karguak baliogabetzea erabaki ahal izango du organo judizial eskudunak, erantzukizuneko jardunbidea abian jarri bada haien aurka legeak aurreikusitako prestasunez ez betetzeagatik.

5- Euskal Autonomia Erkidegoko Fundazioen Erregistroan inskribatuko dira gobernuko organoko kideen izendapena eta kargua utzi izana.

## **10. artikulua.- Patronatukideen kargu uztearen arrazoiak**

Patronatukideek kasu hauetan utziko diote patronatukide izateari:

a) Hiltzen direnean edo hil egin direla deklaritzen denean, eta pertsona juridikoa azkentzen denean.

b) Legeak ezarritakoaren arabera, ezgaitasun-, desgaitasun- edo bateraezintasun-egoeraren batean gertatzen denean.

c) Patronatukide izatera eraman zuten kargua betetzeari uzten diotenean.

d) Kargua ordezkari leial batek berez behar duen arduraz betetzen ez dutenean, baldin eta ebazpen judizialez adierazten bada ez dutela hala bete.

e) Ebazpen judizialez erantzukizun-akzioa onartzen denean.

f) Agintaldia amaitzen zaienean, baldin eta aldi jakin baterako izendatu bazituzten.

g) Karguari uko egiten diotenean.

### **11. artikulua.- Patronatukideak ordezte**

1- Patronatukideak prozedura honi jarraikiz ordeztuko dira:

- Ordezten dituzten entitateek izendatuko dituzte, edo, bestela, estatutu hauetako 8. artikuluan xedatutako moduan egingo da.

2- Ezin direnean patronatukideak aipatutako eran ordeztu, Fundazioaren Legean aurreikusitako estatutu-aldaketara joko da, eta Euskal Autonomia Erkidegoko Fundazioen Babesletzak ahalmena izango du Fundazioa gobernatu eta ordezkatzeko duen organoa behin-behinean -hau da, estatutuak aldatu arte- osatuko duten kideak izendatzeko (kasu batzuetan, kide bakarra izan ahalko da).

3- Uneren batean patronatukideak hiru baino gutxiago badira, patronatukide bakarreko kasuetan izan ezik, gainerako patronatukideek (beti ere haien kargua indarrean dagoela), edo fundatzaileek, hala badagokio, behar adina kide izendatu ahal izango dituzte legeak eskatzen duen gutxieneko kopurura iristeko, eta 30 eguneko epea izango dute izendapen horien berri Babesletzari emateko.

4- Fundazioko patronatukideen ordezkapenak Euskal Autonomia Erkidegoko Fundazioen Erregistroan inskribatuko dira.

### **12. artikulua.- Patronatuaren iraupena**

1- Patronatukidearen kargua gehienez bost urterako izango da, eta pertsona bera denbora mugagabeaz aukeratu ahalko da.

2- Heriotza, ezintasuna, desgaitasuna, heriotza-adierazpena, baztertzea edo bateraezintasuna, aginte-epearen bukaera, ukoa, lekualdatzea edo gobernu-organoko kide baten ordezkatzeari nahiz kargu-uzteari edo beste edozein gorabehera dela eta, bete gabe geratzen diren postuak Patronatuak beteko ditu. Kargu bat ezin izango da egon 6 hilabetetik gora bete gabe.

### **13. artikulua.- Patronatukide-karguaren doakotasuna**

1- Patronatukideek doan jardungo dute beren karguan. Dena den, eginkizun horiei lotuta dituzten gastuen zenbatekoa itzuli egingo zaie, behar bezala justifikatuz gero.

### **14. artikulua.- Fundazioko presidentea**

1.- Elikaduraren, landa-garapenaren, nekazaritzaren eta arrantzaren arloan eskumena duen sailburuordetzako titularra edo dagokion saileko arlo horretako sailburuordea izango da Patronatuko presidentea.

2- Patronatuko presidentea gobernu-organo horren kargu gorena izango da, eta, organo horretako kide izateak berezko dituen ahalmenak izateaz gain, Fundazioa ordezkatu beharko du Patronatuaren erabakietatik eratorritako ekitaldi eta kontratu guztietan eta Fundazioaren beste organoetan, baita aurkezten diren bestelako auzi, espediente eta administrazio, epai eta judizioz kanpoko gaietan ere. Horrez gain, prokuradore eta/edo abokatuei botere orokorrak emateko ahalmena du, azaldutako xedeari buruzko auzietarako.

#### **15. artikulua.- Presidenteordea**

1.- Elikaduraren arloan eskumena duen sailburuordea edo elikagaien industriari dagokion zuzendaritzako kidea izango da Fundazioko presidenteordea.

2- Presidentea ageri ez bada edo gaixo badago, presidenteordeak hura ordezkatu du, eta hori egiaztatzeko nahikoa izango da egoeraren berri ematea. Bai presidente bai presidenteordea ageri ez badira, kide edadetuenak ordezkatu ditu.

#### **16. artikulua.- Idazkaria**

Patronatuak idazkari bat izendatu du, bere kideen artetik edo kanpoko pertsonen artetik. Idazkariaren ardura izango da Fundazioaren administrazio-lanak zuzentzea, dokumentazioa zaintzea eta Patronatuaren Akta Liburura transkribatzen diren bileren akta egitea, haiek onartuak izan eta presidentearen oniritza jaso ondoren.

#### **17. artikulua.- Diruzaina**

Patronatuak diruzain bat izendatu du bere kideen artetik edo kanpoko pertsonen artetik. Funtzio hauek izango ditu:

a) Fundazioaren funtsak biltzea eta gordetzea.

b) Sarreraren eta gastuen balantzea aurkeztea eta sinatzea.

c) Inbentarioen liburuak, kontuak, jarduketaren plana eta eguneko liburuak eramatea.

#### **18. artikulua.- Fundazioaren zerbitzuko langileak**

1- Kudeaketa orokorra gerentzia bati eskatu ahalko zaio, eta haren izendapena eta kargu-uztea Babesletzari jakinarazi beharko zaio. Gerenteari emandako ahalorde



orokorrak Euskal Autonomia Erkidegoko Fundazioen Erregistroan inskribatu beharko dira.

### **19. artikulua.- Patronatuaren eginkizunak**

Fundazioaren gobernuari eta administrazioari dagokion guztia Patronatuaren eginkizuna izango da, eta bereziki hau guztia:

a) Fundazioaren orientazioa ezartzea, haren helburuak ahalik eta hobekien bete daitezen.

b) Ekonomia- eta finantza-baliabide guztiak administratzea, haien jatorria edozein dela ere.

c) Ontzat ematea inbentarioa, egoera-balantzea, emaitzen kontua eta aurreko ekitaldiko memoria, baita aldi horretako jarduketa-planaren likidazioa ere.

d) Hurrengo ekitaldiko jarduketa-plana onartzea, bai eta azalpen-memoria ere.

e) Egoki diren barne-araubideko arauak onartzea.

f) Batzorde delegatuak sortzea, haien batzordekideak izendatzea eta batzorde horiek izango dituzten ahalmenak zehaztea eta ahalorde orokorrak edo bereziak ematea, hurrengo artikuluetan xedatutakoaren arabera.

g) Zuzendaritza-, betearazpen- eta aholkularitza-karguak izendatzea eta arlo teknikoan, administrazioan eta lan orokorretan behar diren gainerako langileak eta mendekoak kontratatzea.

h) Fundazioaren helburuei begira hobekien egokituko diren egintza eta kontratu-mota oro formalizatzea eta onartzea, zeinahi ere den haien izaera: zibila, merkataritzakoa, lan-arlokoa, administraziokoa, eta abar.

i) Erakunde eskudunen aurrean beharrezko proposamenak egitea, maila goragoko erabakia beharko duten gaien kasuan.

j) Enpresa, elkarte, erakunde edo partikularren partaidetza sustatzea elkarlan teknikorako eta langile kualifikatuak trebatzeko programetan, funtsak emanaz eta lankidetzak-hitzarmenak sinatuz.

*k) Herentziak, legatuak edo dohaintzak onartu edo haiei uko egitea, Fundazioarentzat komenigarria den guztietan; hori horrela, Babesletza jakinaren gainean jarriko da.*

*l) Fundazioaren estatutuak aldatzea, Fundazioaren sortzaileen borondatea hobeto betetzeko beharrezkoa bada.*

## **20. artikulua.- Ahalmenak eta ahalordeak eskuordetzea**

*1- Patronatuak kideetako bati eskuorde dakizkioke ahalmenak. Honako gai hauei buruzko erabakiak izan ezik:*

*a) Urteko kontuak onestea.*

*b) Jarduera-plana onestea.*

*c) Estatutuak aldatzea.*

*d) Fundazioa bat-egitea, bereiztea, eraldatzea, azkentzea eta likidatzea.*

*e) Beste pertsona juridiko bat eratzeko egintzak, ez badaude helburuei erabat lotuta.*

*f) Beste pertsona juridiko batzuetako partaidetzak eskuratzeko edo saltzeko egintzak, baldin eta partaidetza horien zenbatekoa Fundazioaren aktiboaren % 20 baino gehiago bada.*

*g) Fundazioaren aktiboaren % 20 gainditzen duten ondasun edo eskubideak xedatzeko edozein egintza.*

*h) Zuzkidura handitzea edo gutxitzea.*

*i) Aktibo eta pasibo guztiak edo batzuk bat-egitea, bereiztea edo lagapen orokorra egitea.*

*j) Sozietateak edo beste pertsona juridiko batzuk azkentzeko egintzak.*

*k) Patronatuko kideen autokontratazioa, salbu eta jarduketa hori errepikatua bada eta Babesletzak aurretik baimendu badu kasu berdinetarako.*

*l) Erantzukizunpeko adierazpenak onartzea eta formalizatzea.*

*1- Era berean, Patronatuak botere orokorrak eta bereziak eman edo ezeztatu ahal izango ditu.*

2- Aurreko paragrafoan adierazitako mugekin, Patronatuak batzorde ordezkariak eta betearazleak eratu ahal izango ditu, kasu bakoitzean zehaztutako ahalmenekin, baita ahaldun orokorrak edo berezia izendatu ere, mankomunatutako funtzioen edo funtzio solidarioen arabera. Ordezkaritza eta ahalduntze orokorrak, auzietarako ez bada, eta horiek ezeztatzeak, Fundazioen Erregistroan eman beharko zaie izena.

### **21. artikulua.- Batzorde betearazleak edo eskuordetuak**

Patronatuak batera eta betirako eskuordetu ahalko ditu bere ahalmenak Patronatuko zenbait kideren alde, eta, horretarako, batzorde betearazleak edo eskuordetuak sortu beharko ditu.

### **22. artikulua.- Patronatuaren betebeharrak**

Fundazioko patronatukideek honako betebeharrak izango dituzte:

a) Fundazioaren helburuak zorrotz betetzea eta betearaztea, legeak eta Fundazioaren estatutuek diotenari jarraikiz.

b) Fundazioaren ondarea osatzen duten ondasunak eta eskubideak administratzea eta haien produktibitateari eustea, kudeatzaile on baten ekonomia- eta finantza-irizpideei jarraikiz.

c) Kargua ordezkari leial baten prestasunaz betetzea.

### **23. artikulua.- Patronatukideak autokontratzea**

1.- Patronatukideek edo haien ordezkariak ezingo dute Fundazioarekin kontraturik egin, ez beren izenean ez hirugarrenen izenean, salbu eta Babesletzak horretarako baimena ematen badu, erregelamendu bidez ezarritako prozeduraz.

2- Fundazioaren helburuak ahalik eta ondoen lortzeko egingo dira kontratuak, ez dute interesen arteko gatazkarik sortuko, eta merkatuaren arabera egingo dira, Fundazioan kontratazioaren ardura duen pertsona edo organoak aurretik erabaki arrazoitua eman eta gero.

### **24. artikulua.- Patronatukideen erantzukizuna**

1- Patronatukideek solidarioki erantzungo dute Fundazioaren aurrean, legearen edo estatutuen kontrako egintzen ondorioz edo kargua eduki beharreko arduraz ez betetzeagatik eragiten dituzten kalteengatik eta galerengatik.

2.- Hauek guztiak erantzukizunetik aske geratuko dira: erabakiaren kontra bozkatu dutenak, erabakia hartzen eta betearazten parte hartu ez eta erabakiaren berririk ez zutela frogatzen dutenak, bai eta, erabakiaren berri izan arren, kaltea ekiditeko komeni zen guztia egin zutela edo gutxienez esanbidez aurka agertu zirela frogatzen dutenak ere.

## **25. artikulua.- Patronatuaren barneko funtzionamendua**

1- Patronatuak 2 bilera egingo ditu gutxienez, urtean. Urteko lehenengo sei hilabeteetan ezinbestez elkartuko da urteko kontuak onartzeko, bai eta ekitaldi bakoitzaren amaierako azken 3 hilabetetan ere hurrengo ekitaldiko jarduketa-plana onartzeko.

2- Patronatuaren deialdiak idatziz egin beharko dira, presidenteak erabakitako gai-zerrenda jasota, eta gobernu-organoko kideen iradokizunak kontuan hartuta. Deialdiok bilera-eguna baino gutxienez 10 egun lehenago egin beharko dira, premiazko kasuetan izan ezik; horrelakoetan, epea 3 egunetara murriztu ahal izango baita.

## **26. artikulua.- Patronatua osatzea eta erabakiak hartzea**

1.- Patronatua balio osoz eraturik egongo da lehenengo deialdian, gutxienez kideen erdiak gehi bat agertzen direnean, bertan egonda edo ordezkari bidez.

2.- Aurreko paragrafoan adierazi den quoruma biltzen ez bada, Patronatua ordubete geroago elkartuko da. Bigarren bilera horretarako, berdin izango da zenbat kide azaltzen diren, betiere gutxienez hiru biltzen badira eta haien artean presidentea eta presidenteordea badira.

3.- Aurreko paragrafoetan adierazitakoa gorabehera, Patronatua deitu egin dela eta zilegi osatuta dagoela ulertuko da, kide guztiak bertan badaude, eta aho batez onartzen badute bilera egitea.

4.- Erabakiak botoen gehiengoz hartuko dira, honako kasu hauetakoren bat izan ezik:

a) Aldaketa, bategite, bereizketa eta azkentzeari buruzko erabakien kasuan, nahitaezkoa izango da Patronatuko kideen bi herenek aldeko botoa ematea.

5.- Presidente diharduenaren botoak sor litezkeen berdinketak hautsiko ditu.

6.- Idazkariak Patronatuaren bilera bakoitzaren akta egingo du, zeinean, bileraren tokiaz eta egunaz gain, bertaratu diren pertsonen izenak, eztabaidagaiak eta hartutako erabakien edukia jasoko baitira.

7.- Patronatua bideokonferentziaren edo beste komunikabide batzuen bidez bildu ahalko da, betiere hau guztia bermatzen bada: bertaratutakoen identifikazioa, komunikazioaren jarraitutasuna, eztabaidetan esku hartzeko aukera eta botoa emateko aukera. Horrela eginez gero, bilera presidentea dagoen lekuan egin dela ulertuko da.

8.- Salbuespen gisa, bilerarik egin gabe ere hartu ahal izango ditu erabakiak Patronatuak, betiere informazio- eta boto-eskubideak bermatuta badaude, botoa jaso dela nonbait agerrarazten bada eta haren benetakotasuna bermatzen bada. Erabakia pertsona juridikoaren helbidean hartu dela ulertuko da, eta emandako baliozko botoetatik azkena jasotako datan.

### **III. TITULUA.- ONDAREA ETA ARAUBIDE EKONOMIKOA**

#### **27. artikulua.- Fundazioaren ondarea**

Fundazioaren ondarea honako hauek osatuko dute: batetik, zuzkidura osatzen duten eta ekonomikoki balioets daitezkeen ondasunek, eskubideek eta obligazioek; eta, bestetik, eratu ondotik Fundazioak lortutakoek –zuzkidurari lotu ala ez–.

Fundazioaren ondarea balorazio ekonomikoa izan dezaketen ondasun-eskubide guztiek osa dezakete.

Fundazioak, xedapen- eta administrazio-egintzetan, aplikagarriak zaizkion arauak bete behar ditu, eta haien fruitu edo errentak Fundazioaren berezko xedeetarako erabili behar ditu, estatutu hauetan xedatutakoaren arabera betiere.

Fundazioak bere zuzkidura handitzera zuzendu behar ditu diru-sarrereren soberakinak.

#### **28. artikulua.- Baliabideak**

Fundazioaren ondareak honako osagai hauek izango ditu:

- a) Fundazioa sortzeko eskrituran jasotzen den hasierako zuzkidura.
- b) Europar Batasunetik, Eusko Jaurlaritzatik, lurralde historikoetako foru-aldundietatik eta beste erakunde eta administrazio publikoetatik datozen sarrerak.
- c) Aurrerantzean eta zuzenbidean onartutako edozein bitarteko erabiliz eskuratzen duen beste edozein ondasun edo eskubide, eta, bereziki, beste pertsona edo erakunde batzuek emandako legatu, dohaintza, ekarpen eta dirulaguntzak direla bide eskuratzen dituztenak. Dohaintza, legatu eta jarauntsirik onartuz gero, horren berri eman behar zaio Babesletzari.
- d) Fundazioak egiten dituen jardueren fruituak edo errentak, produktuak edo mozkina, bai eta ematen dituen zerbitzuen trukean jasotako ordainketak ere, indarrean dagoen legediaren arabera.

e) Aplikatzeko lege-esparruan dagoen beste edozein baliabide.

## **29. artikulua.- Fundazioaren ondarea zaintzea**

1- Fundazioaren ondarea zaindu eta babesteko, honako arau hauek bete beharko dira:

a) Fundazioaren ondarea osatzen duten ondasun eta eskubideak Fundazioaren izenean egon behar dira. Inbentarioan jaso beharko dira, eta, kasuan kasu, dagozkien erregistroetan inskribatuko beharko dira.

b) Ondasun higiezinak eta/edo benetako eskubideak Fundazioaren izenean inskribatuko dira, Jabetza Erregistroan. Inskribatu daitezkeen gainerako ondasunak dagozkien erregistroetan inskribatuko dira.

c) Balioak eta eskudirua, jabetza-tituluak, gordailu-ordezkagiriak eta jabaria, jabetza, erabilera, gozamina edo Fundazioaren titulartasunean dagoen beste edozein eskubide egiaztatzen duten beste edozein dokumentu Fundazioaren izenean gordeko dira, Patronatuak ezarritako erakundean.

d) Gainerako ondasun higigarriak Patronatuak zehazten duen eran gorde eta zainduko dira.

2- Ondasun edo eskubide horiek guztiak Inbentario Liburuan zehaztuko dira. Liburu hori Patronatuko idazkariaren ardurapean egongo da, eta bertan, haren ikuskaritzapean, haiek identifikatzeko eta deskribatzeko beharrezkoak diren inguruabar guztiak agertuko dira.

## **30. artikulua.- Ekonomia- eta kontabilitate-betebeharrak**

1- Urteko kontuak onetsi eta hurrengo 30 egun naturaleko epearen barruan, Fundazioaren Patronatuak Euskal Autonomia Erkidegoko Fundazioen Erregistrora bidali beharko ditu urteko kontuak, behar bezala sinatuta, gordailu ditzaten. Kontuok irabazi asmorik gabeko erakundeetarako ezarritako kontabilitateari buruzko arauak bete beharko dituzte.

2- Fundazioaren urteko kontuek elementu hauek jasoko dituzte gutxienez: balantzea, emaitzen kontua, memoria eta aurreko jarduera-planaren likidazioa. Orobat,

*Patronatuak kontu-ikuskaritzaren txostena aurkeztuko du, Euskal Autonomia Erkidegoko Fundazioen Legean aurreikusitako kasuetan.*

*3- Halaber, kontuotan honako datu hauek guztiak jaso beharko dira: Fundazioaren ondarezko, ekonomia eta finantza-egoera, urtean zehar egindako jarduerak eta ondarearen kudeaketa ekonomikoa, Fundazioaren helburuak eta lege arauak bete direla jakinarazi eta egiaztatzeko nahikoa.*

*4- Ekitaldi ekonomikoa urtebetekoa izango da, eta urte naturalarekin bat egingo du.*

*5- Fundazioak jarduketan plan bat egingo du ekitaldi ekonomiko bakoitzeko, non diru-sarrerak eta gastuak adieraziko baititu orekaz. Plan hori Babesletzari aurkeztuko zaio, onartzen den urtearen azken hiruhilekoan, azalpen-memoriarekin batera.*

### **31. artikulua.- Fundazioaren ondarearen ezarpena**

*1- Gutxienez emaitzen kontuaren diru-sarreraren % 70 baliatu beharko ditu Fundazioak bere helburuak gauzatzeko. Diru-sarrera horiek kontzeptu guztiak direla-eta lortuak izango dira, diru-sarrerak lortzeko Fundazioak izandako gastuak kenduta, Fundazioaren helburuak betetzeari buruzkoak izan ezik. Irabazi eta diru-sarrerak lortu direneko ekitaldiaren hasieratik hasi eta ekitaldi hori itxi ondoren hiru urte igaro arte izango da obligazio hori betetzeko epea.*

*2- Administrazio-gastutzat joko dira Fundazioaren ondarea osatzen duten ondasunen eta eskubideen administrazioak zuzenean eragindakoak, bai eta patronatuko kideek haien karguak betetzeagatik egindakoak ere, baldin eta diru hori itzulia izateko eskubiderik badute.*

### **32. artikulua.- Ekonomia-, enpresa- edo merkataritza-jarduerak garatzea**

*1- Ekonomia-, enpresa- edo merkataritza-jarduerak egin ahal izango ditu Fundazioak, zuzenean nahiz beste erakunde batzuen bitartez, halako jarduerak Fundazioaren helburuekin lotuta badaude edota jarduera horien osagarriak edo lagungarriak badira, eta betiere lehiaren defentsarako arauari men eginez.*

*2- Gainera, beste erakunde batzuetan kide izanda ere parte hartu ahal izango dute beste edozein ekonomia-jardueratan, sozietate-zorren gainean erantzukizun pertsonalik ez dagoen kasuetan.*

### **33. artikulua.- Xedatze- eta zergapetze-egintzak**

*1- Euskal Autonomia Erkidegoko Fundazioen Babesletzari jakinarazi beharko dizkio Fundazioak bere ondarea osatzen duten ondasunen edo eskubideen kostu bidezko edo*

doako xedatze-egintzak, baita kargatze-egintzak ere, EAEko Fundazioen Legean adierazita egonez gero.

2- Patronatuak erantzukizunpeko adierazpena aurkeztu beharko dio Babesletzari, non zehaztuko baita xedatzeko edo kargatzeko erabakia behar bezala hartu dela eta horretarako arrazoiak eta beharrak zein diren, orobat eragiketak Fundazioari ez diola kalterik eragiten eta haren bideragarritasun ekonomikoa ere ez duela arriskuan jartzen.

3- Xedatze- edo kargatze-egintzen xede diren ondasun edo eskubideek merkatuan duten balioa Fundazioaren aktiboaren % 60 baino handiagoa bada, Patronatuak azterlan ekonomikoa bat erantsi beharko dio erantzukizunpeko adierazpenari, profesional independente batek egina. Adierazpenean azaldutakoa egia dela ziurtatu beharko du azterlanak, eta Fundazioaren bideragarritasun ekonomikoa bermatu beharko du, bai eta eragiketa irizpide ekonomiko-finantzarioekin eta merkatukoekin bat datorrela ere.

4- Aipatutako xedatze- edo zergapetze-egintzak Euskal Autonomia Erkidegoko Fundazioen Erregistroan jasoko dira, edo beste edozein erregistrotan inskribatuko dira, hala badagokio. Gainerako xedatze- edo zergapetze-egintzak Babesletzari urtero aurkeztu beharreko memorian jaso beharko dira.

#### **IV. TITULUA.- ALDATZEA, BAT EGITEA, BEREIZTEA, AZKENTZEA ETA LIKIDATZEA**

##### **34. artikulua.- Estatutuak aldatzea**

1- Fundazioaren Patronatuak estatutu hauek aldatzea sustatu dezake, Fundazioaren helburuak hobeto betetzeko egokia bada betiere.

2- Estatutuak aldatzeko erabakia kideen bi herenen aldeko botoaz, gutxienez, hartu beharko da.

##### **35. artikulua.- Bat egitea**

1- Patronatuak beste entitate batekin edo batzuekin bat egitea erabaki ahal izango du, betiere Fundazioaren helburuak behar bezala babesten badira.

2- Bat egiteko erabakia arrazoitu egin beharko da; kideen bi herenen aldeko botoaz, gutxienez, hartu beharko da, eta Euskal Autonomia Erkidegoko Fundazioen Erregistroan inskribatu.

##### **36. artikulua.- Azkentzea**

Fundazioa azkendu egingo da:



- a) *Eratu zenean finkatutako epea amaitzen denean.*
- b) *Eratu zenean finkatutako helburua erabat betetzen denean.*
- c) *Fundazioaren helburua betetzea ezinezkoa denean, Euskal Autonomia Erkidegoko Fundazioen Legean estatutuak aldatu, bat-egin eta bereizteari buruz xedatutakoa gora behera.*
- d) *Bategite-prozesu baten ondorioz hala gertatzen bada.*
- e) *Eratze-eskritura publikoan aurreikusitako arrazoiak gertatzen direnean.*
- f) *Legeek aurreikusitako beste edozein arrazoi gertatzen denean.*

### **37. artikulua.- Azkentzeko prozedura**

1- *Aurreko artikuluko a) idatzi-zatian adierazitakoa gertatuz gero, Fundazioa zuzenbide osoz azkenduko da.*

2- *Aurreko artikuluko b), c) eta e) idatzi-zatietan adierazitakoa gertatuz gero, Fundazioa azkentzea Patronatuak erabaki beharko du eta Babesletzak berretsi. Patronatuaren erabakirik ez badago edota haren erabakia Babesletzak berresten ez badu, ebazpen judizial arrazoitua beharko da Fundazioa azkentzeko, Patronatuak edo/eta Babesletzak eskatuta, kasuen arabera.*

3- *Aurreko artikuluko f) idatzi-zatian adierazitakoa gertatuz gero, ebazpen judizial arrazoitua eskatuko da.*

4- *Fundazioa azkentzeko erabakia arrazoitua egin beharko da; Patronatuko kideen bi herenen aldeko botoaz, hartu beharko da, gutxienez.*

5- *Azkentzeko erabakia edo, hala badagokio, ebazpen judizial arrazoitua, Euskal Autonomia Erkidegoko Fundazioen Erregistroan inskribatuko da.*

### **38. artikulua.- Soberako ondarearen likidazioa eta erabilera**

*Fundazioaren likidazioaren ondoriozko ondareak eta eskubideak Eusko Jaurlaritzak jasoko ditu, eta honek zehatuko du horien xedea eta helburua, Estatutu hauetan finkatutako interes orokorreko helburuen arabera.*

### **39. artikulua.- Fundazioa eraldatu eta bestelako erakunde bihurtzea**

1- Fundazioa eraldatu eta beste mota bateko pertsona juridiko bihurtu daitezke, betiere irabazi asmorik gabekoa bada. Nolanahi ere, pertsona juridiko horrek jatorrizko Fundazioaren helburuak bete beharko ditu, Euskal Autonomia Erkidegoan izango du jardueraren-eremua eta Fundazioaren ondareari eutsiko dio oso-osorik, organo juridiko publiko baten tutoretzapean.

2- Eraldatzeko erabakia Fundazioaren Patronatuak onetsi behar du; zer pertsona juridiko mota bihurtu nahi duen ere erabakiko du, baita estatutuetan egin beharreko aldaketak ere.

3- Eraldaketarekin ez da Fundazioa azkenduko, ez eta likidazio-prozedura irekiko ere, eta bere nortasun juridikoari eutsiko dio. Euskal Autonomia Erkidegoko Fundazioen Erregistroan baja emango zaio dagokion erregistroan inskribatzeko.

3- Eraldatzeko erabakia arrazoitu egin beharko da; Patronatuko kideen bi herenen aldeko botoaz, gutxienez, hartu beharko da, eta Euskal Autonomia Erkidegoko Fundazioen Erregistroan inskribatu.

## **V. TITULUA.- BABESLETZA ETA FUNDAZIOEN ERREGISTROA**

### **40. artikulua.- Euskal Autonomia Erkidegoko Fundazioen Erregistroa**

Fundazio honen eraketa Euskal Autonomia Erkidegoko Fundazioen Erregistroan inskribatuko da, bai eta haren egintza edo negozio juridiko guztiak ere, legearen arabera hala egin behar badute.

### **41. artikulua.- Euskal Autonomia Erkidegoko Fundazioen Babesletza**

Fundazio hau Euskal Autonomia Erkidegoko Fundazioen Babesletzaren zainzapean, aholkularitzapean eta kontrolpean egongo da, indarrean dauden legeetan ezarritakoaren arabera.

### **42. artikulua. Zehapen-araubidea**

Fundazioak Euskal Autonomia Erkidegoko Fundazioen Legean ezarritako zehapen-araubidea bete behar du”.